

To'on yó'o kían nì taa San Pablo nì sa'an noó nà ñoo Éfeso

Ká'an Pablo ndisá'an

1 ¹ Yu'u kúú Pablo, ta kúúí iin apóstol, nà né'e to'on Jesucristo, táto'on kì'o kónì mií Ndios. Ta ká'an yu'u ndisá'an xí'ín ndo'ó, nà ndéi ñoo Éfeso, ndo'ó nà kúú ñayuu Ndios, ndo'ó nà ndíta toon xí'ín Cristo Jesús. ² Ta mií tatá yo Ndios xí'ín sato'o yo Jesucristo ná kee na ña manì xí'ín ndó, ta naki'o na ña koo va'a ini ndo.

Ki'o di'a nì kemáni Ndios yo

³ Ná natiin Ndios, nà kúú tatá sato'o yo Jesucristo, ndidaá tá'an ñañó'ó. Mií ná nì kemáni ná yó xí'ín ndidaá ña va'a ió noo ná, ta nda noo ió nà nda induú nì tanda'á ná ña nì kixian sa'á ña nì kee Cristo. ⁴ Ta nda rá ko ñá'a kasá'á sa'a ñayuu, nda daá vá nì kaxi na yó sa'a Cristo, dá ná kakuu yó nà koo vii, nà koó kuachi noo mií ná. ⁵ Ta sa'á ña kú'u ini nà sa'a yo, sa'á ñoo nda daá nì chikaa ini nà ña kakuu yó de'e mií ná sa'a Jesucristo, chì kì'o dión nì nata'an ini mií ná kee na. ⁶ Dión nì kee na, dá kían ná naki'o yó ñañó'ó noo ná sa'á ña manì ká'ano nì kee na xí'á, dá ná natiin va'a na yó sa'á de'e manì ná. ⁷ Chì xí'ín ni de'e na nì taó xóo na yó noó ña kánian ndo'o yó sa'á kuachi kée yó, ta nì ku'u ká'ano ini nà sa'a yo, chì ká'ano nda'o ña manì nì kee na xí'ín yó. ⁸ Ta sa'á ña manì ká'ano nì kee na xí'ín yó, sa'á ñoo nì ni'i yo ña koo ndichí xíxi yó xí'ín ña kaon koo ñaxintóni yo, ⁹ dá chì nì xì'o na ña nì kandaa ini yo sa'á ña nì chikaa ini nà kee na, tá'an ña nì sa io de'é noo ná, chì kì'o dión nì nata'an ini nà. Ta ndidaá ña yó'o kúú ña nì chikaa ini nà kee na. ¹⁰ Chì tá ná xinkoo ku'u nì kaxi mií ná, ko'on nà nachì'i na ndidaá tá'an ña'a tixi ndá'a Cristo, dá dándáki ñaá ná, mián kían ña ñó'o induú, o mián kían ña ió noó'ó yó'o.

¹¹ Ta sa'a mií Cristo nì kaxi Ndios yóo, dá chì nda mí sa'a nì saki nà ña ni'i yo ña va'a noo ná, táto'on kì'o nì chikaa ini nà, chì kée na ndidaá ña'a táto'on kì'o kónì mií ná, ¹² dá natiin na ñañó'ó sa'á ndu'u, nà Israel, chì ndu'u kúú nà sa daá ndáti kasaa Cristo. ¹³ Ta dión ni ndo'ó, sa'a Cristo nì seídó'o ndó to'on va'a ña ká'an ña kuu káki ndó tá nì kandísa ndó ña. Sa'á ñoo nì ni'i ndo Espíritu iì Ndios táto'on kì'o nì xì'o na to'on na noo yo. Ta nà yó'o kúú táto'on iin sello, ña ná'a ña kúú ta'ani ndó ñayuu Ndios. ¹⁴ Ta sa'á ña ió Espíritu iì ná ini yo, ñoo kían ná'a ña natiin yó ña nì kaa tatá yo Ndios kì'o na noo yo tá ná kasandaá ku'u nakuaka na ñayuu mií ná kande na noo ió nà, dá natiin na ñañó'ó sa'a ndidaá ña manì nì kee na xí'ín ñayuu nà.

Xíkạ Pablo ñạ manị noọ Ndios ñạ ná kị'o na ñạ koo ndichí yọ noó ñạ'a mií ná

¹⁵ Sa'á ñoó, tá nị kandaạ inii ñạ ndíta ndaạ ndọ xí'ín ñạ kándéé iní ndọ sato'o yọ Jesús, ta kú'u ta'ani ini ndọ sa'a ndidaá kạ nạ kúú ñayuu Ndios, ¹⁶ ndạ daá, ta ndạ viti kọ sá tuu ta'on yu'u ñạ naki'oi ndivé'e noọ Ndios sa'a ndọ, chị daá kuití ndíko'on inii ndọ'ó noọ ká'ín xí'ín ná, ¹⁷ nạ kúú Ndios noọ sato'o yọ Jesucristo, nạ kúú tatá yọ, nạ kánian natiin ndidaá ñañó'ó. Chị xíkạ noọ ná ñạ naki'oi na ñạ koo ndichí ndọ, ta kị'o na ñạ katónị va'a ini ndọ, dá kasandaá ndọ kana'á va'a ndó mií ná. ¹⁸ Ta xíkạ ta'anii noọ ná ñạ ná dátoon nạ ñaxintónị ndọ, dá ná kana'á ndó sa'á tandeé iní, ñạ kían nị nakana na ndọ'ó natiin ndó, ta kana'á ta'ani ndó ndi kị'o ndato ñạ va'a ko'on nạ kị'o na noọ ndọ, tá'an ñạ ko'on nạ kị'o na noó ñayuu mií ná, ¹⁹ ta katónị ta'ani ini ndọ ndi kị'o ká'ano ndéé kómí ná, tá'an ñạ kéchóon na, dá chindeé ná yóó, nạ kándisa ñaá. Ta mií ndéé yó'o nị kéchóon Ndios, ²⁰ dá nị danátaki nạ Cristo tein nạ kúú ndịi, ta nị chikoo ñaá ná xoo kuá'a nạ ndạ noọ ió nạ induú. ²¹ Ta kómí ná choon sata ndidaá tá'an taa né'e choon ná'ano, xí'ín sata ndidaá tạ dándáki, xí'ín sata ndidaá tạ ndíta noọ, xí'ín sata ndidaá tạ kúú sato'o. Ta kómí ná iin kuu ndáya'i cháá kạ o duú ndidaá kạ ñayuu. Ta o duú ñayuu yó'o oon ni kían dión, ndạ ñayuu vẹi chí noọ kakian dión. ²² Chị nị nachi'i Ndios ndidaá tá'an ñạ'a tixi sa'a Cristo, ta nị chikani ñaá ná kakuu na dinị noọ ndidaá nạ kúú kuendá mií ná. ²³ Ta ñayuu yó'o kúú yikí koño Cristo, ta dáyino na ñạ kónị nạ xí'ín ñayuu nạ, chị iin tó'ón mií ná kúú nạ dáyino ndidaá tá'an ñạ'a táto'on kánian kooan.

Nị dakáki Ndios yọ sa'á ñạ manị nị kee na xí'ín yó, ta o duú sa'á ñạ va'a kée yó

2 ¹ Ta nị sa'an Ndios nị danátaki nạ ndọ'ó, chị ndịi va nị sa kuu ndó noọ ná sa'á ñạ kọ ní sá seídó'o ndó choon sa'ándá nạ, xí'ín sa'á ñạ nị sa kee ndó kuachi. ² Chị sa kee ndó kuachi yó'o tá sata táto'on kée nạ kúú kuendá ñayuu yó'o, ta sa kee ndó ñạ kónị ñạ né'e choon noọ táchị káa, tá'an ñạ dándáki ñaxintónị ñayuu kọ seídó'o choon sa'ándá Ndios. ³ Ta ndidaá vá yó nị sa kee dión tá sata, chị sa xionoo yó sa kee yó ñạ kónị ñị yọ, chị sa kee yó ñạ kini kónian xí'ín ñạ kini sa katoó ñaxintónị yọ. Ta sa'á ñạ sa kuu yó ñayuu kómí kuachi, sa'á ñoó sa xido ini Ndios sa xini nạ yó táto'on kị'o ndó'o ta'ani ndidaá kạ ñayuu kọ ná'á ñaá. ⁴ Tído ká'ano ndạ'o ini Ndios, ta kú'u ndạ'o ini nạ sa'a yọ, ⁵ dá chị va'ará ndịi nị sa kuu yó noọ ná sa'á kuachi sa kee yó, tído nị xí'o na ñạ nị natakị yọ noọ ná, ta takí yọ xí'ín Cristo viti. Dá chị sa'á ñạ manị nị kee na xí'ín yó, sa'á ñoó nị kạki yó noó ñạ kánian ndọ'o yó sa'á kuachi kée yó. ⁶ Ta nị natakị dáó yó xí'ín ná nị kee Ndios, ta nị nacheidei ta'ani na yó ndạ induú xí'ín Cristo Jesús. ⁷ Ta dión nị kee na xí'á, dá daá kuití

na'a na ndi ki'o ví ká'ano ña maní nī kee na xí'ín yó, chí nī kee na ña va'a xí'ín yó sa'á ña nī kee Cristo Jesús. ⁸ Chí sa'á ña maní nī kee Ndios xí'ín ndó, sa'á ñoó nī dakáki na ndo'ó sa'á ña kándéé iní ndo Jesús. Ta kō ní dakáki na ndo xí'ín ndéé mií ndó, chí kían iin ña maní nī kee na xí'ín ndó, ⁹ chí kō ní dakáki na ndo'ó sa'á ña kée ndó ña va'a, dá kían nī iin tó'ón ndó ná o chíndaya'i mií ndó. ¹⁰ Dá chí mií vá Ndios kúú na nī kava'a ñaá, ta sa'á ña nī kee Cristo Jesús, sa'á ñoó nī kava'a na yó ña kían kee yó ña va'a, tá'an ña nī chikaa ini na kee yó nda míi sa'a.

Ndéi va'a yó xí'ín iin rá iin yó sa'á ña nī kee Jesús sa'a yo

¹¹ Ta o sa nándodó ndo'ó, na kō kúú na Israel xaan, ña tá sata nī kaa na Israel ña kúú ndo'ó, “na kō ní ta'anda ñíi.” Dión kaá na chí kúú ná na nī ta'anda ñíi, ta sa'á ñoó ká'an ná ña kúú ná na ñoo Ndios, tído xí'ín ndá'a ta va nī ta'anda ñíi ná. ¹² Nda tiempo sata ñoó kō ní sá kuu ndó kuendá Cristo, sa'á ñoó nī iin kuu vá kō ní kasandaá ndo kakuu ndó na ñoo Ndios tát'on kúú na Israel. Ta nī lú'u ví kuendá kō ní sá komí ndó noó to'on nī xi'o Ndios noó ñayuu na. Ta nī lú'u ví tandeé iní kō ní sá komí ndó nī sa ndei ndó ñayuú yó'o, ta nī kō ní sá na'á ví ndó ndá yoo kúú Ndios takí. ¹³ Tá sata kō ní sá na'á ndó Ndios, xíká sa ndei ndó noo ná. Tído viti, ndíta ndó xí'ín Cristo, sa'á ñoó nī natuu yati ndó noo Ndios sa'á ña nī xita nīi Cristo sa'a ndo.

¹⁴ Chí mií Cristo kúú na nī nachindei va'a yó, sa'á ñoó na ñoo Israel xí'ín na kō kúú na Israel, nī nduu na iin tó'ón ñoo nī kee Cristo, dá chí nī sa'an na nī dítá ná ña sa kedaá xí'ín ná sa xini u'u tá'an na. ¹⁵ Ta sa'á ña nī xi'i Cristo, sa'á ñoó nī dandí'i na ley xí'ín choon sa'ándáan. Ta ki'o dión nī ndee na ñayuu Israel xí'ín na kō kúú na Israel iin tó'ón vá, dá kakuu na iin tó'ón ñayuu saá, dá ná koni na kandeí va'a na. ¹⁶ Ta sa'á ña nī xi'i na ndika cruz, sa'á ñoó nī nachindei va'a na ñayuu Israel xí'ín na kō kúú na Israel xí'ín Ndios, chí sa'á ña nī xi'i Cristo ndika cruz, sa'á ñoó nī dítá ná ndidaá ña sa kedaá xí'ín ná sa xini u'u tá'an na.

¹⁷ Nī kii Cristo ñayuú yó'o, ta nī daná'a na to'on va'a ña xí'o ña kandeí va'a yó xí'ín Ndios, ta nī daná'a naán noo ndo'ó, na nī sa ndei xíká noo Ndios, xí'ín noó ndu'u, na ndéi yati noo Ndios. ¹⁸ Chí sa'á ña nī kee Jesús, sa'á ñoó na Israel xí'ín na kō kúú na Israel nī ni'i ña ndu'u yó noo ió tatá Ndios kée iin tó'ón na kúú Espíritu ií.

¹⁹ Sa'á ñoó kō kúú ka ndo na tukú o na xionoo ndava'a. Dá chí nī ni'i ndo ña kakuu ndó ñayuu Ndios, ta nī ni'i ta'ani ndó ña kakuu ndó kuendá na ve'e na. ²⁰ Ta noó to'on nī daná'a na kúú apóstol, xí'ín to'on nī daná'a na sa kuu profeta nī sa kuíta iin rá iin ndó. Ta mií Jesucristo kúú yuú titō ndáya'i kúú do'o ve'e, ²¹ chí xí'ín míi yuu ñoó luu kasá'á kátō tá'an sa'a vé'e káva'an kua'an xinkooan kakuuan iin ve'e ño'o ií sato'o yo Jesús. ²² Ta xí'ín míi ná sá káva'a ndó kua'an ndo, dá xino ndó kakuu ndó iin ve'e noo koo Ndios kée Espíritu ií ná.

Ni chikani Ndios Pablo ña dána'a na noó na ko kúu na Israel

3 ¹ Ta yu'u, Pablo, kéchóon sa'a choon yó'o. Nákaaí ve'e kaa viti sa'á ña dána'i to'on Cristo Jesús noo ndo'ó, na ko kúu na Israel. ² Ta sa ni ni'i tó'on ndó ña ni xi'o Ndios choon noo yú'u ña kían chindeéi ndo'ó, dá ni'i ndo ña maní xí'o na noo ndo. ³ Ta ni na'a túu Ndios ña ni sa io de'é noo ná noo yú'u. Ta sa ni taa va yu'u cháá sa'á ña yó'o kosaaan noo ndo. ⁴ Tá ka'i ndó ña, dá kandaá va'a ini ndo ña ná'á yu'u ña ió de'é noo Ndios, ña ká'an sa'a Cristo. ⁵ Ta ko ní xi'o na ña kandaá ini ñayuu sa ndei sa na'á sa'án. Tído viti kándaá ini na kúu apóstol xí'ín profeta na sa'á ña yó'o kée Espíritu ii Ndios. ⁶ Tá'an ña sa io de'é ñoó kían kaá ña natiin ta'ani ndo'ó, na ko kúu na Israel, ña va'a ko'on Ndios ki'o na noó na Israel, ta ndee na ndo'ó iin tó'on ñoo xí'ín na ñoo Israel, ta koo ta'ani ta'i ndo noó ña ni kaa Ndios ki'o na noó na Israel sa'á ña ni kee Cristo Jesús, táto'on ki'o ká'an to'on va'a ká'an sa'a ná. ⁷ Ta ni chikani Ndios yu'u ña kían dána'i to'on yó'o, chi choon yó'o ni kemáni ná yu'u, ta xí'ín ndée mií ná kándééi kéei ña. ⁸ Ta va'ará kúu yu'u na ló'o cháá ka noo ndidaá ka ñayuu Ndios, tído ni xi'o na choon yó'o noó yu'u, ña kían dána'i noó na ko kúu na Israel ndi ki'o ná'ano ña va'a xí'o Cristo, ⁹ ta ki'oi ña kandaá ini ndidaá ñayuu sa'á ña ni chikaa ini Ndios kee na nda míi sa'a, tá'an ña ni sa io de'é noo ná, ta mií ná kúu na ni kava'a ndidaá tá'an ña'a. ¹⁰ Ki'o dión, dá na'a yóo, na kúu kuendá Jesús, ndi ki'o ká'ano ña ndichí kómí Ndios, dá kían kandaá ini ña kómí choon xí'ín ña dándáki chí induú sa'án. ¹¹ Chi ki'o dión ni chikaa ini Ndios kee na nda rá ko ñá'a kava'a ñayuu yó'o. Ta xí'ín ña ni kee Cristo Jesús, na kúu sato'o yo, ni daxínkoo na ña ni chikaa ini na kee na. ¹² Ta viti ió tandeé iní noo yo, ta nónó noo yo nakuíta yó noo Ndios sa'á ña kándéé iní yo Jesús. ¹³ Sa'á ñoó seí nda'ávii noo ndo ña ná dá'a ni ndiko ndó sa'á ña ndó'o níoi sa'á ña dána'i noo ndo'ó, dá chi ña va'a mií ndó kían.

Kóni Pablo ña kandaá va'a ini yo ndi ki'o kú'u ini Jesús sa'a yo

¹⁴ Sa'á ñoó nákuuin xitíi noo Ndios, na kuu tatá sato'o yo Jesucristo, ká'in xí'ín ná. ¹⁵ Ta mií ná kúu na xí'o iin kuu noo ndidaá ñayuu na, á mií ná ndéi na induú o noñó'o yó'o. ¹⁶ Ta xíkai noo ná ña táto'on ki'o ió kua'á ña kuiká na chí induú, ki'o dión kendakí ná ndo'ó xí'ín ndée ká'ano kómí míi ná, dá ná koo ndeé iní ndo kee Espíritu ii ná, ¹⁷ dá ná koo Cristo níno ndo dándáki na sa'á ña kándéé iní ndo ná, dá ná kuíta toon ndó xí'ín ña kú'u ini na sa'a yo, ta kandiko toon ndoan, ¹⁸ dá kandeé ndó kandaá va'a ini ndo xí'ín ndidaá ka ñayuu Ndios ndi ki'o ká'ano ña kú'u ini Cristo sa'a yo, ta ndi ki'o kánián, ta ndi ki'o konóan, ta ndi ki'o dikóan, ¹⁹ dá kasandaá ndo kana'á va'a ndó ndi ki'o kú'u ini

Cristo sa'a yo, va'ará ko kándeé ta'on ñaxintóni yo kandaá ndi'i inian sa'án. Ta ki'o dión xíkai noo ná, dá nakutí ndó xí'ín ñaxintóni Ndios.

²⁰ Ta mií ná kúú na kómí ndée ká'ano, ta kándeé ná kée na cháá ka ña'a noo ndidaá ña xíka yo noo ná o ña kasandaá ñaxintóni yo nakani inian, dá chi sa'á ña ió ndée ná ini yo, sa'á ñoó kée na ña'a ná'ano xí'ín yó. ²¹ Ta ná natiin mií ná ndidaá ñañó'ó noo na kúú kuendá na, ta sa'a mií Jesús daá ná natiin na ñañó'ó, ta ki'o dión daá kuití ná natiin naan. Dión ná koo.

Iin tó'ón vá ni nduu yó ni kee Espíritu iñ Ndios

4 ¹ Nákaa yu'u ve'e kaa sa'á ña né'i to'on Jesús, na kuu sato'o yo, ta seí nda'ávii noo ndo ña ndi'i ini ndo kendísá'ano ndó táto'on ki'o kánian kee na ni kana Ndios xoo mií ná. ² Nda'í koo ini ndo, ta va'a koo ini ndo, ta kueé ná koo ini ndo, ta ki'o ndeé iní ndo sa'a iin rá iin ndó sa'á ña kú'u sátá'an ini ndo sa'a ndo. ³ Ta koo ini ndo ña iin tó'ón ná kakuu ndó, chi mií Espíritu iñ Ndios kúú na xí'o ña kandeí ndó dión, sa'á ñoó koo ini ndo kandeí va'a ndó xí'ín iin rá iin ndó. ⁴ Dá chi iin tó'ón vá ni nduu yó, ta iin tó'ón vá Espíritu kómí yó, ta iin tó'ón ta'ani tandeé iní kían ni nakana ñaá Ndios natiin yó. ⁵ Dión ta'ani iin tó'ón vá kúú sato'o yo, ta iin tó'ón kúú ña ndaa kándisa yó, ta ni sodo ndúta yo savá'a sa'á ña kándeé iní yo Jesús, ⁶ ta iin tó'ón vá kúú Ndios, na kúú tatá ndidaá yó. Ta mií ná kúú na kómí choon sata ndidaá yó, ta mií ná kúú na kedaá, dá kanda yo noo choon na, ta ió na ini ndidaá yó.

⁷ Ta iin rá iin yó ni natiin ña katia yó kee yó iin choon noo Ndios táto'on ki'o ni chikaa ini mií Cristo dasá naan noo iin rá iin yó. ⁸ Sa'á ñoó ká'an tuti iñ Ndios di'a:

Tá ni kaa na nda noo díkó, dá ndáka na taa sa naá xí'ín ná kua'an na.

Ta ni dasá ná ña va'a noo iin rá iin ñayuu na.

⁹ ¿Ndiva'a ká'an tuti iñ Ndios ña ni kaa na noo díkó, ká'an ndó? Dión kaáan, dá chi dinñó'ó ni noo na ni kii na nda noo ninó cháá ka noñó'o yó'o. ¹⁰ Ta mií ná kúú na ni noo ni kixi noñó'o yó'o, ta mií ná kúú na ni kaa tuku nda noo díkó, dá dákutí ná ndidaá kúú xían xí'ín ña ndato kée na. ¹¹ Ta mií vá ná kúú na ni xi'o noo iin rá iin yó ña katia yó kee yó iin choon noo Ndios, chi ni kee na dao yó ña kakuu yó apóstol, dá kane'e yó to'on Jesús, ta dao ka yo kakuu profeta, ta dao ka yo kakuu na xionoo dána'a sa'a Jesús, ta dao ka yo kakuu na ndáka na kúú kuendá Jesús, ta dao ka yo kakuu na kandita dána'a. ¹² Ta ki'o dión ni kee na xí'ín yóo, na kúú ñayuu Ndios, dá katia yó kechóon yó noo ná, dá koni yo dákuá'ano yó iin rá iin na kúú kuendá Cristo xí'ín to'on Ndios, ¹³ dá ví kasandaá yo kakuu yó iin tó'ón noo ña kándeé iní yo de'e Ndios, xí'ín noo ña ná'á yó sa'a ná. Ndi'i, dá koni yo kasandaá yo nda noo kóni Ndios, chi kasandaá yo kakomí yó ñaxintóni táto'on ki'o kúú ñaxintóni Cristo. ¹⁴ Dá kían, ná dá'a ni ndo'o yó táto'on ndó'o takuáli, chi vitá ini

xi, sa'á ñoó xoo di'a xoo di'a kua'an ñaxintóni xí kée ña to'ón dána'a dao ta mañá. Chì taa yó'o kúú ra kéndaa ra ña to'ón dána'a ra, dá kandeé rá dándá'í ñaá rá xí'ín ña mañá tì'a ra. ¹⁵ Va'a kaan ná ndiko yo ña ndaa xí'ín ña kú'u ini yo sa'a dao ka ñayuu, dión keeá, dá ná kua'ano yó koo yó tát'on kì'o kóni Cristo, na kúú dinì noo yo. ¹⁶ Ta kúú yó tát'on yikí koño na. Chì tát'on kì'o ndó'o yó xí'ín yikí koño mií yó, ña nákatò tá'an xí'ín tuchi yo, ta chindeé tá'an, dá sá'anoan kua'an, kì'o dión ndó'o yó xí'ín Jesús, chì mií ná kúú na dákuá'ano yó, dá katì'a yó ku'u ini sa'a sátá'an yó.

Ná koo iniò keeá tát'on kì'o kóni Jesús

¹⁷ Xí'ín choon ni xi'o sato'o yo Jesús noói, sa'ándái choon noo ndo ña ná dá'a ka ni kee ndó tát'on kée ñayuu ko ná'á Ndios, chì kée na ndidaá ña nóo ndáki ini na, ¹⁸ chì kómí ná iin ñaxintóni iin naá, ta xíká vá ndéi na noó ña kóni Ndios, chì ko ná'á ta'on na sa'á ña'a Ndios sa'á ña kaxí nda'o níó ná. ¹⁹ Ta sa'á ña ko xíka'an ka noo ná, sa'á ñoó ni nakì'o na mií ná noo ndidaá ña kini xí'ín ña ka'an noo, chì ni nakì'o na mií ná noo ndidaá ka ña yakó noo Ndios.

²⁰ Tído ndo'ó, tá ni seídó'o ndó sa'a Cristo, ko ní dákuá'a ndó ña kee ndó dión ²¹ tá miían ndaa ni seídó'o ndó to'on na, tá miían ndaa ni dákuá'a ndó ña ndaa sa'a ná, chì noo iin tó'ón dinì Jesús ió ña ndaa. ²² Tá sata sa kee ndó ña kóni mií ndó, tído viti dánkoo ndó ñayuu yátá ni sa kuu ndó, ña ni chitíán ñó'o ña kini, ña dándá'í ndo'ó, dá kee ndó ña kóni ñíi ndo. ²³ Di'a kì'o ndó mií ndó ña ndusaá níó ndo xí'ín ñaxintóni ndo, ²⁴ dá nduu ndó iin ñayuu saá, na ni kava'a Ndios koo tát'on kì'o kóni mií ná, dá kakuu ndisa ndó iin ñayuu ndaa, iin ñayuu vii noo míí ná.

²⁵ Sa'á ñoó ná dá'a ka ni ka'an to'ón ndó, ndino'o ña ndaa ka'an ndo xí'ín ñayuu xi'ín ndó, dá chì iin tó'ón vá kúú yó. ²⁶ Ta va'ará xido ini ndo, ná dá'a ni ya'a ndó kee ndó kuachi. Ná dá'a ni kandati ndó nda keta ndindii, dá ya'a ña xido ini ndo, ²⁷ ta ná dá'a ni konó ndó noó ña u'u ña dátúú ñaá. ²⁸ Ta ndo'ó, na kí'in kuí'íná, ná dá'a ka ni ki'in kuí'íná ndó. Di'a koo ini ndo kechóon ndó, ta xí'ín ndá'a míí ndó kee ndó choon va'a, dá ni'i ndo ña'a kemáni ndo na kúnda'í. ²⁹ O sa kóo ini ndo ka'an ndo to'on kini kua'an xí'ín ni iin tó'ón ñayuu. Di'a ñóchí vii ka'an ndo xí'ín ná, dá ná ni'i iní na kua'ano na íchi Ndios. Tá kee ndó dión, dá kían chindeé ndó ñayuu seídó'o. ³⁰ Ná dá'a ni dákúnda'í iní ndo Espíritu ií Ndios, dá chì mií ná kúú tát'on iin sello ni ni'i ndo, ña ná'a ña kúú ndó ñayuu mií ná, dá naki'in na ndo'ó tá ná kasandaá kuu nakuaka ñaá ná noo ió na. ³¹ Ná dá'a ka ni ta'u'u ini ndo koni ndo dao ka ñani ndo, ta ná dá'a ka ni kuido ini ndo, ta ná dá'a ka ni karyíí ndó, ta ná dá'a ka ni kayu'ú ni'i noo sátá'an ndó, ta ná dá'a ka ni chinaní kini ndó ñani ndo, ta ná dá'a ni kee ndó ndidaá ña kini yó'o noo dao ka ñani ndo. ³² Di'a

va'a koo ini ndo xí'ín iin rá iin ndó, ta ku'u ini sa'a sátá'an ndó, ta ku'u ká'ano ini sa'a sátá'an ndó táto'on k'i'o nì ku'u ká'ano ini Ndios sa'á kuachi mií ndó sa'á ña nì kee Cristo.

Miían kánian koo vii yo, chí kúú yó de'e Ndios

5 ¹ Kúú ndó de'e manì Ndios, sa'á ñoó kee ndó táto'on kée mií ná, ² ta ku'u ini ndo sa'a dao ka ñayuu táto'on k'i'o kú'u ini Cristo sa'a míí ndó, dá chí nì nakì'o na mií ná nì xí'i na sa'a yo, ta ña nì doko ná mií ná nì sa kuu táto'on iin ña'a támi sá'an noo Ndios.

³ Ta o sa kí'o ndó ña ka'an ñayuu ña kée ndó kuachi xí'ín na ko kúú ñadi'í ndo o yíi ndo, o kée ndó ña ka'an noo, o ña kátoó ndo kakomí ndó kuá'á ña kuiká. Di'a kee ndó ña kánian kee na kúú ñayuu Ndios. ⁴ Ta ná dá'a ni ya'a ndó ka'an ndo to'on nóo, xí'ín to'on ko choon, xí'ín to'on kini, dá chí ko kánian kee yó dión sa'á ña kúú yó ñayuu Ndios. Va'a kaan daá nakì'o ndó ndivé'e noo Ndios. ⁵ Ta kana'á ndó ña ni iin tó'ón ta'on na kée kuachi xí'ín na ko kúú ñadi'í na o yíi ná, xí'ín na kée ña ka'an noo, xí'ín na kátoó kakomí kuá'á ña kuiká, noón kúú na o koni ta'on na natiin na ta'i ná noo dándáki Cristo xí'ín Ndios. Chí na kátoó téi ña kuiká, ñoó kúú yokó noo ná. ⁶ O sa kónó ndó ña ni iin tó'ón ñayuu ná o sa dándá'í ndo'ó xí'ín to'on mañá, dá chí miían ndaa kuiti noo ñayuu kée dión vei ña xído ini Ndios sa'á ña ko seídó'o na choon sa'ándá na. ⁷ Tído ndo'ó, ná dá'a ni ndiko ndo ña kée na kée dión.

⁸ Dá chí tá sata, dá sa kuu ndó ñayuu sa ñin naá ñaxintóni. Tído viti nì natoon va ñaxintóni ndo sa'á ña kúú ndó ñayuu sato'o yo Jesús. Sa'á ñoó koo ini ndo kee ndó táto'on k'i'o kée na kúú ñayuu nì natoon noo. ⁹ Dá chí ña va'a xí'o Espíritu iì Ndios noo yo kíán ña kakuu yó ñayuu vá'a, ta kakuu yó ñayuu ndísá'ano, ta kana'á yó ña ndaa. ¹⁰ Ka'i va'a ini ndo sa'a ndidaá ña'a, ná nde'á á kíán ña náta'an ini sato'o yo Ndios kee ndó. ¹¹ Ta o sa kí'o ndó mií ndó kee ndó ña ko ndáya'i kée ñayuu ñin naá ñaxintóni, di'a koo ini ndo kuñó'ó ndó ña nóo kée na, ¹² dá chí iin ña ka'an noo kíán ña kantó'ón yó sa'á ña kini kede'é na. ¹³ Ndidaá vá ña'a nátuu tá natoon ñó'o, ta xí'oan ña kándaa ini yo ndá ña'a kíán, dá chí ndidaá vá ña'a nátuu tá natoon ñó'o. ¹⁴ Sa'á ñoó ká'an na di'a:

Ndoto yo'ó, taa kídì xaan.

Ndakoo tein na kúú táto'on ndii xaan,

dá dátoon Cristo ñaxintónon.

¹⁵ Sa'á ñoó kua'án ndo kandaa ndo mií ndó noo iin rá iin ña'a kée ndó, o sa kée ndó táto'on kée na ndeé to'on, va'a kaan kee ndó táto'on kée na ió ñaxintóni. ¹⁶ Ndí'i ini ndo kee ndó ña va'a viti nóno noo ndo, dá chí tiempo kini nda'o kíán ndéi yó viti. ¹⁷ Ta ná dá'a ni kakuu ndó ñayuu xixi, di'a k'i'o ndó mií ndó ña kíán kandaa ini ndo ndí kíán kóni Ndios kee ndó.

¹⁸ Ná dá'a ni ko'o ndó vino, dá dáxini ndó mií ndó, dá naá ini ndo kee ndó ña ko vá'a. Va'a kaan konó ndó ná nakutí ndó xí'ín Espíritu ij Ndios. ¹⁹ Ta ka'an ndo tein iin rá iin ndó salmo xí'ín himno, xí'ín yaa ij. Ta ndino'o ini ndo kata ndó yaa yó'o keká'ano ndó sato'o yo Jesús, ²⁰ ta daá kuití naki'o ndó ndivé'e noo Ndios, na kúú tatá yo, sa'á ndidaá ña'a ndó'o ndó, chi kúú ndó kuendá Jesucristo, na kúú sato'o yo.

Ká'an Pablo sa'a ndí kían kánian kee na ni tandá'a

²¹ Kueídó'o tá'an ndó sa'á ña ió ñañó'ó ndó noo Ndios. ²² Ta dión ni ndo'ó, na ñá'a xaan, kueídó'o ndó yíi ndo táto'on seídó'o ndó sato'o yo Jesús. ²³ Dá chi yíi ndo kúú dini noo ndo táto'on k'i'o kúú Cristo dini noo ñayuu mií ná, na kúú táto'on yikí koño na. Ta mií ná kúú na dákaaki ñaá. ²⁴ Sa'á ñoó táto'on k'i'o seídó'o ndó Cristo, k'i'o dión kánian kueídó'o ndó yíi ndo noo ndidaá ña'a.

²⁵ Ta ndo'ó, ra ta xaan, ku'u ini ndo sa'a ñadi'í ndo táto'on k'i'o kú'u ini Cristo sa'a ñayuu na, chi ni xi'o na mií ná ña kían ni xi'i na sa'a yóó, na kúú kuendá na, ²⁶ dá koo vii yo noo Ndios, chi ni dandóo na kuachi yó sa'á ña ni nakata na yó xí'ín takuií, ta kiróón kúú to'on na. ²⁷ Dión, dá kuu natiin na yó kakuu yó ñayuu mií ná, ta kakuu yó ñayuu ndato, ta ni lú'u ta'on yáko o káne'e yó, ta ni o kóo titi ta'on yó táto'on k'i'o ndó'o dá'on, ta o ndó'o ta'on yó dao ka ña'a kua'an táto'on kua'an ña yó'o. Di'a kakuu yo na ndaa vii, na ñochí ndaa noo ná.

²⁸ Sa'á ñoó kánian ku'u ini ndo'ó, ta ta xaan, sa'a ñadi'í ndo táto'on kú'u ini ndo sa'a yikí koño mií ndó, dá chi ta kú'u ini sa'a ñadi'í ra, roón kúú ra kú'u ini sa'a mií rá. ²⁹ Dá chi ko íin ta'on káñó'ó yikí koño mií ná. Di'a ndaa na ñá, ta xíto na ña. Dión ta'ani kée Cristo xí'ín yó, na kúú ñayuu na, ³⁰ chi kúú yó yikí koño na. ³¹ Sa'á ñoó kánian dánkoo ta tatá ra xí'ín naná ra, dá naki'in tá'an ra xí'ín ñadi'í ra, dá kían nduu na nda iin tó'ón vá. ³² Ndichí nda'o kua'an ña yó'o, tído ni ka'in sa'an, dá dákí'in tá'in ña xí'ín táto'on ndó'o Cristo xí'ín ñayuu na. ³³ Sa'á ñoó iin rá iin mií vá ndó, ta ta xaan, kánian ku'u ini sa'a ñadi'í ndo táto'on k'i'o ndó'o ndó xí'ín mií ndó. Ta ndo'ó, na ñá'a xaan, kánian koo ñañó'ó ndó noo yíi ndo.

6 ¹ Ta ndo'ó, takuáchí yíi xí'ín takuáchí di'í kuendá sato'o yo Jesús, koo ini ndo kueídó'o ndó tatá ndo xí'ín naná ndo, chi ña yó'o kían va'a noo Ndios. ² “Koo ñañó'ó ndó noo tatá ndo xí'ín noo naná ndo”, kaá choon sa'ándá Ndios. Ta ña yó'o kúú choon mií noo ña kían dána'a noo yo ña nandió né'e Ndios ña va'a noo yo ñayuu yó'o, ³ chi ká'an ta'ani na: “Tá kée ndó dión, dá kían koni ndo kandeí va'a ndó, ta koni ndo kua'ano yatá ndó ñayuu yó'o.”

⁴ Ta dión ta'ani ndo'ó, na kúú tatá xí'ín naná, ná dá'a ni koo ini ndo dákuído ini ndo de'e ndó. Di'a koo ini ndo dákuá'ano va'a ndó xi, ta

va'a taó ndo xí, ta dána'a ndo noo xí ná kee xi táto'on ki'o kóni sato'o yo Jesús.

⁵ Dión ni ndo'ó, na ñó'o tixi ndá'a iin sato'o ñayuú yó'o, koo ini ndo kueídó'o ndó na xí'ín ndino'o ini ndo, ta kayu'ú ni'ini ndó na xí'ín ña nda'í ió ini ndo táto'on ki'o kée ndó xí'ín Cristo. ⁶ Kechóon va'a ndó, va'ará ko iin sato'o ndo ndé'é rá ndo'ó, ta ná dá'a ni kee ndó táto'on kée na ndúkú ña nata'an ini taa koni ñaá rá. Va'a kaan kechóon ndó noo na kúú sato'o ndo táto'on ki'o kéchóon ndó noo Cristo. Ndino'o ini ndo kechóon ndó, chi ki'o dión kóni Ndios kee ndó. ⁷ Sa'á ñoó ndino'o ini ndo kechóon ndó noo sato'o ndo. Kee ndó kuendá ña noo sato'o yo Ndios vá kéchóon ndó, ta o duú noo taa ñayuú yó'o, ⁸ chi sa ná'á vá míí ndó ña táto'on ki'o káa iin rá iin ña va'a ni kee ndó, ki'o dión koo ña va'a nandió né'e Ndios noo ndo, á mií ndó ñó'o ndó tixi ndá'a iin sato'o o koó.

⁹ Ta dión ni ndo'ó, na kúú sato'o, keva'a ndó xí'ín na ñó'o tixi ndá'a ndo, ta o sa dáyu'ú ndo ná xí'ín to'on ká'an ndo, chi sa ná'á vá míí ndó ña nda induú ió sato'o ndo, na kúú ta'ani sato'o na ñó'o tixi ndá'a ndo. Ta sa ná'á ta'ani ndó ña ko iin ta'on maní cháá ka noo ná, iin nóó kúú ndi'i va yó noo ná.

Ná kandixi yó nda'á chóon, ña kían xí'o Ndios noo yo, dá kandeé yó xí'ín ña u'u

¹⁰ Ñani maní mií, noo ndidaá ña'a, koo ini ndo kendakí ndó mií ndó xí'ín ña kándisa ndó sato'o yo Jesús, ta kendakí ta'ani ndó mií ndó xí'ín ndéé ká'ano mií ná. ¹¹ Ta nandixi ndó nda'á chóon, ña kían xí'o Ndios noo ndo, dá kandeé ndó kandita ni sisa ndó kuió né'e ndó ña kini tánda'á ña u'u vei noo ndo. ¹² Dá chi ko naá ta'on yó xí'ín ñayuú xi'ín yó, di'a naá yo xí'ín ña kini né'e choon noo táchi káa, xí'ín ña kini ndakí cháá ka ndéi noo táchi káa, xí'ín ña kini dándáki níó ñayuú ndéi ñayuú iin naá yó'o, xí'ín iin rá iin tu'u ña kini xionoo noo díkó káa. ¹³ Sa'á ñoó nandixi ndó ndidaá nda'á chóon xí'o Ndios noo ndo kechóon ndó, dá kandeé ndó naá ndo xí'ín ña kini tein kuu vei ña dándó'oan níó ndo, dá kían kandeé ndó kuita toon ndó noo ndidaá ña vei ndo'o ndó. ¹⁴ Sa'á ñoó kuita toon ndó, dá chi sa ndíko va cincho tiji ndó, ña dándáki ña ndíko ndo ña ndaa sa'a Ndios. Ta sa ndíxi ta'ani ndó ka ndadí yu'ú ndíká ndo, ña dándáki ña kúú ndó ñayuú ndaa noo Ndios. ¹⁵ Ta sa yí'i ta'ani ndó ndisa ndo, tá'an ña dándáki ña sa ió nduu ndo kanoo ndó dána'a ndo to'on va'a Jesús, ña kían nachindei va'a ñayuú xí'ín Ndios. ¹⁶ Ta noo ndidaá ña'a natiin ndó ka dá'ándá, ña né'e soldado chindeé rá míí rá, chi ka yó'o dándáki ña kándéé iní ndo Jesús. Ta xí'ín ña yó'o kandeé ndó chituu ndó yiryókó kéji ita tánda'á ña kini vei dándó'o níó ndo. ¹⁷ Ta natiin ta'ani ndó ka kaño'o ndó, dá chindeéan dini ndo, ta ña yó'o dándáki ña ni káki ndó ni kee Ndios. Ta natiin ta'ani ndó espada,

ñā kían xí'o Espíritu iī Ndios noo ndo. Ta espada yó'o kúú to'on Ndios.
¹⁸ Ta daá kuití koo ini ndo ka'an ndo xí'ín Ndios, ta kueí nda'í ndo noo ná xí'ín to'on xí'o Espíritu iī. Ta daá kaño'o ini ndo ka'an ndo xí'ín ná, ta o sa kátuu ndó ñā kaka ndo ñā manī noo Ndios sa'a ndidaá ka ñayuu kuendá mií ná. ¹⁹ Ta kaka ta'ani ndó ñā manī noo Ndios sa'a yú'u, dá nani'í to'on ka'in, dá kían ná dá'a ni yu'íi dána'i noo ñayuu ndi dándáki to'on va'a sa'a Jesús, ñā kían ni sa io de'é noo Ndios, ²⁰ chí mií Ndios ni xí'o choon yó'o nooí, ta sa'a ñā dána'i to'on va'a yó'o, sa'a ñoó nákaai ve'e kaa. Ta kaka ta'ani ndó ñā manī noo ná sa'í, dá ná koo ndeé iní ka'in sa'a to'on yó'o táto'on kí'o kóni mií ná.

Xí'ín ndisá'an yó'o dándí'i Pablo ñā ká'an na

²¹ Tá kosaa ñani manī yo Tíquico noo ndéi ndó, dá nakani ra xí'ín ndó sa'a ñā ndó'i xí'ín sa'a ñā kéei. Ta iin taa ndisá'ano nda'o kúú rá iin ra noo choon sato'o yo Jesús. ²² Ta sa'a choon yó'o tánda'í ra kosaa ra noo ndo, dá nakani ra xí'ín ndó sa'a ndidaá ñā ndó'o ndu, ta kí'o ra tandeé iní noo ndo.

²³ Ná kí'o tatá Ndios xí'ín sato'o yo Jesucristo ñā ná koo va'a ini ndo'ó, ñani, ta ná kí'o ta'ani na ñā ná ku'u ini sa'a sátá'an ndó sa'a ñā kándéé iní ndo ná. ²⁴ Ta ná koo ñā manī xí'o Ndios xí'ín ndidaá ní ndo'ó, na ndino'o ini kóni sato'o yo Jesucristo. Dión ná koo.